



Progetu finantziatu cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

Sa gruta de is Gianas

A tres quartus de ora de sa bidda de Sàdali ddoi est una gruta e inni ddoi biviant is gianas, issas podiant otenni totu su chi boliant poita ca Deus, ca cumandat in su celu e in sa terra, aici iat cumandau.

Aintru de cussa gruta, ca est manna e bella, s'agatat totu su chi si disìgiat, e totu su chi podiat serbiri a is chi boliant bivì cumentì a sennoris, cumentì fiant issas etotu, est a nai: su forru po coxinai su pani, sa coxina cun totu su chi serbit po coxinai, e totu su chi podiat serbiri a sa genti in cussus tempus.

Perou is gianas si fiant papadas su frenu e iant esagerau, po custu motivu Deus si fiat arrannegau e ddas iat castigadas, casi ca si-ndi fiant aprofitadas.

A Deus non praxiat ca cussas fadessint cumentì sa genti comuna, est a nai de unu didu si-ndi pigant unu bratzu e po mori de custu cumportamentu ddas iat mudadas in pedras.

In sa domu de gianas si podint biri ancora oi totus is trastus imperaus in coxina de is gianas, sa mola, su forru e totu su chi serbiat po coxinai. Incrubadas acanta de s'oru de s'arriu si podint biri fintzas is gianas.

Sa stòria de su mercaderi

Sa noti de Santu Giuanni in Seuleris (est una tanca acanta de Esterzili), unu mercaderi bessit a s'ora de mesunoti, su monti s'aperit e totu su chi su mercaderi tenit de bendi ddu spaniat in sa tanca, arroba de dònna genia. Brocau de oru, seda, rasu.

Una de cussas notis passat inni un'òmini a cuaddu, iat biu unu grandu arrogu de brocau c addi fiat praxu, ndi-dd'iat boddiu e pinnicau cun issu.

Su mercaderi ddu bidit e ddi currit avatu, ma s'òmini curriat de prus poita non ddi boliat torrai s'arroba. Ma totinduna ita birit: innantis a issu una spacadura in sa terra aici ca non podiat sighiri a bandai.

Intzandus su cadderi, ca iat furau su brocau, si fiat biu giai-giai cassau e si fiat invocau a Santu Valentinu e dd'iat nau:

- Santu Valentinu miu! Fai a manera ca su mercaderi non mi cassit! Aici de custu brocau si nd'apa a fai unu bellu bistiri.

Intzandus sa terra si fiat serrada torra e su cadderi furuncu si fiat pòtziu furi.

De intzandus e fintzas a oi, in cussus tretus, sa noti de Santu Giuanni sa genti timit a nci passai.